



PREMIOS DA CRÍTICA DE GALICIA
premiosdacriticagalicia@gmail.com
www.premiosdacriticagalicia.org

BASES DOS PREMIOS DA CRÍTICA DE GALICIA 2021

PRIMEIRA. Os **Premios da Crítica de Galicia** institúense coa finalidade de facer público o recoñecemento que, dentro do marco xeral da cultura galega, merezan os labores individuais ou colectivos que cada ano cristalicen en achegas relevantes para os diversos ámbitos da creación cultural e da investigación en Galicia.

SEGUNDA. Os **Premios da Crítica de Galicia** abranguen oito modalidades:

CREACIÓN LITERARIA. Considéranse premiáveis todas aquelas obras de narrativa, poesía, ensaio e textos dramáticos, incluíndo a creación literaria infantil e xuvenil, editadas en lingua galega entre o **1 de xaneiro e o 31 de decembro de 2020**.

INVESTIGACIÓN. Considéranse premiáveis todas aquelas obras que, resultado dunha investigación contrastada e rigorosa, fosen editadas entre o **1 de xaneiro e o 31 de decembro de 2020** ou desenvolvementos/fitos tecnolóxicos presentados no mesmo período. O xurado valorará de forma prioritaria traballos publicados en lingua galega, o que non se considera excluínte se o obxecto da investigación fose de alta repercusión para Galicia.

MÚSICA. Considéranse premiáveis todos aqueles traballos de composición, interpretación, compilación musical editados en formato de partituras, discos ou comunicados publicamente en Internet entre o **1 de xaneiro e o 31 de decembro de 2020**. Considéranse tamén premiáveis as composicións e obras musicais estreadas nese período e os labores interpretativos nos que concorran características que lles confiran unha recoñecida proxección ao longo do mesmo período. Outrosí, poderán recoñecerse todas aquelas iniciativas que ao longo do ano contribuísen de xeito relevante á promoción da música na sociedade galega. Así mesmo, considéranse premiáveis todas aquelas persoas que, tendo unha traxectoria iniciada con anterioridade, ofrecen dentro ou fóra de Galicia **un fito destacado na música durante o ano 2020**.

INICIATIVAS CULTURAIS E CIENTÍFICAS. Considéranse premiáveis todos aqueles feitos ou labores que, emprendidos por persoas, asociacións, empresas, entidades ou todo tipo de institucións, destacasen na defensa, pulo ou espallamento da cultura e da ciencia galegas e que, podendo ser consecuencia dunha traxectoria iniciada con anterioridade, **permanecesen vixentes durante o ano 2020**.

ARTES PLÁSTICAS. Considéranse premiabes todos aqueles traballos de pintura, escultura, ilustración, fotografía, arquitectura e deseño que fosen realizados, presentados en exposicións ou comunicados publicamente de forma presencial ou virtual entre o **1 de xaneiro e o 31 de decembro de 2020**. Así mesmo, considéranse premiabes todas aquelas persoas que, tendo unha traxectoria iniciada con anterioridade, ofrecen dentro ou fóra Galicia **un fito destacado no eido das artes plásticas e visuais durante o ano 2020**.

ARTES ESCÉNICAS. Considéranse premiabes nesta modalidade todos aqueles traballos de teatro, danza, maxia e circo, estreados de forma presencial ou virtual entre o **1 de xaneiro e o 31 de decembro de 2020**. Así mesmo, considéranse premiabes todas aquelas artistas do eido das artes escénicas que, tendo unha traxectoria iniciada con anterioridade, ofrecen dentro ou fóra de Galicia **un fito destacado durante o ano 2020**.

CINE E ARTES AUDIOVISUAIS. Considéranse premiabes nesta modalidade todos aqueles traballos de cine, vídeo, televisión, videocreación e outras expresións das artes audiovisuais, estreados ou comunicados publicamente de forma presencial ou virtual entre o **1 de xaneiro e o 31 de decembro de 2020**. Así mesmo, considéranse premiabes todas aquelas artistas do eido do cine e artes audiovisuais que, tendo unha traxectoria iniciada con anterioridade, ofrecen dentro ou fóra de Galicia **un fito destacado durante o ano 2020**.

CULTURA GASTRONÓMICA. Considéranse premiabes nesta modalidade todas aquelas iniciativas de cultura gastronómica desenvolvidas entre o **1 de xaneiro e o 31 de decembro de 2020**. Así mesmo, considéranse premiabes todas aquelas persoas e entidades do eido da cultura gastronómica que, contando cunha traxectoria iniciada con anterioridade, ofrecen dentro ou fóra de Galicia **un fito destacado durante o ano 2020**.

TERCEIRA. O xurado de cada unha das modalidades terá competencia exclusiva para establecer os criterios de valoración (calidade, incidencia social, oportunidade, novidade...) de cada unha das candidaturas participantes. Con todo, **o recoñecemento da excelencia e da relevancia para a cultura galega** que ofrezan as achegas a considerar, deberá ser a guía sobranceira no seu proceso de avaliación. Así mesmo, naquelas manifestacións culturais que precisen da intervención do idioma este será o galego.

CUARTA. As persoas que formen parte de cada un dos xurados serán designadas pola asociación PREMIOS DA CRÍTICA DE GALICIA entre aquelas recoñecidamente solventes en cada un dos eidos aos que atinxe cada unha das modalidades. Os membros do xurado non poderán ter relacións de autoría ningunha coas candidaturas participantes na súa modalidade, comprometéndose a aceptar as presentes bases.

QUINTA. O **xurado de cada modalidade** compoñeráse de **sete persoas con voz e voto**, entre as que se incluíra unha secretaría vinculada á asociación PREMIOS DA CRÍTICA DE GALICIA. A secretaría fará circular a información que se fose solicitando entre as candidaturas presentadas, convocará as reunións do xurado (sexan presenciais ou virtuais) e levantará acta dos acordos adoptados en cada unha delas.

SEXTA. O premio será único e indivisible en cada unha das modalidades, **podendo quedar deserto**, se así o considera o xurado. As decisións finais de cada un dos xurados, que serán inapelables e adoptadas por maioría de votos, tomaranse se as condicións sanitarias o permiten nunha sesión de traballo presencial que se celebrará en Vigo o mesmo día do ditame.

SÉTIMA. Todas as producións que se consideren premiáveis en cada unha das modalidades **poderán ser presentadas** polos súas autoras e autores, editoras, produtoras ou promotoras ás secretarías dos xurados **antes do 30 de setembro de 2021**. Así mesmo, cada un dos membros dos xurados poderá presentar cantas candidaturas considere oportunas para a súa valoración polo resto dos membros.

OITAVA. Os ditames de cada unha das modalidades daranse a coñecer, se as condicións sanitarias o permiten, no decurso dun acto que se celebrará en Vigo o sábado **13 de novembro de 2021**.

Galicia, 23 de xullo de 2021